



Aningaasaqarnermut, Aatsitassanut, Inatsisit  
Atuutsinneranut Naligiisitaaanermullu  
Naalakkersuisoq

Ulloq: 18-12-2021  
J.nr.: 01.31.06/21-00970

## **Aningaasaqarnermut Akileraartarnermullu Ataatsimiititaliap sisamangorneq 13. januar 2022 aalajangerneranik Naalakkersuisunut ilisimatitsissut**

**Neriniartarfiuteqarnermik inuussutissarsiuteqartunut, kiffartuussinermik inuussutissarsiuteqartunut timersortarfinnut, katersortarfinnut il.il. ikiorsiissutit nutaat. Ataatsimiititaliap suliaa nr. 01.31.06/22-00970.**

”Naalakkersuisut **inassuteqaatigaat,**

- “20-mi ikiorsiissutit” siusinnerusukkut akuerineqarnikut annertusineqassasut aammalu illoqarfinnut nunaqarfinnullu inuit 20 katersuussinnaaneranik killilersuiffiqineqartunut najoqqutassiat aqqitat tassunga ilaasut ilanngullugit sivitsorneqassasut.
- Konto pingaarnermi 20.10.34-imi akuersissutit 10,0 mio. koruuninik qaffanneqassasut.
- Inuussutissarsiornermut Niuernermullu Naalakkersuisoq “20-mi ikiorsiissutinut” najoqqutasiat oqaasertaasa allanngortinnissaannut piginnaatinneqassasoq.”

## **Aningaasaqarnermut Akileraartarnermullu Ataatsimiititaliap oqaaseqaataa**

Ataatsimiititaliap paasivaa Naalakkersuisut ataatsimiititaliami suliarigasuarneqarnissaanik piumasaqarnerat Naalakkersuisullu inassuteqaataannik tigusaqarnini ataatsimiititaliap qujassutigaa. Ataatsimiititaliap suliamik suliaqarnermini kigaallattoqarsinnaanera pissusissamisoortuussasoq allakkiamik ilanngussamik nassiussisoqarsimannginnerata kingunerisaanik aallaqqaasiullugu ataatsimiititaliap maluginiaqquaa.

Naalakkersuisut ersarissumik tamakkiisumillu suliamik saqqummiussinermi suliap suliarigasuarneqarsinnaasoq ataatsimiititaliap erseqqissassavaa. Ilassutissamik aningaasaliissutissamut ersarissumik paasiuminartumillu siunertamik tunuliaqutaasunullu suliamik saqqummiussiviusoq.

Naalakkersuisunut saqqummiussap missingersuutitullu ilanngussap ilanngunneqartup allagaatitut immikkoortutut atuarneqarsinnaanerat pingaaruteqarpoq. Ilassutitut aningaasaliissutissatut qinnuteqatigisamut missingersuutit ilanngussap aningaasaliissuteqarnissamut tunuliaqutaasumut naammaginartumik nassuiaataasinnaanera piviusuussasoq isumaqarpoq. Naalakkersuisunut pingaarnertut suliarisatut, saqqummiussap siunertaanik, tunuliaqutaanik, imarisaanik Naalakkersuisut anguniagaannut ataqatigiinneranut nassuiaaneq, Naalakkersuisunut saqqummiussami paasissutissat ilanngunneqarsimanerat naammangilaq.

Sukkasuumik toqqaannartumillu assersuussineq pisinnaavoq ikiorsiissummut taarserneqartussamut malittarisassat ilanngussatut kakkiunneqarsimasuuppata ataatsimiititaliallu suligasuarsinnaaneranut iluaqutaasimassalluni.

Inassutit ilaanni kissaatigineqarpoq Inuussutissarsiornermut Niuernermullu Naalackersuisup 20-mi ikiorsiissutini malittarisassanut aaqqissuinikkut allannguissaminut pisinnaatinneqassasoq. Naalackersuisut iluminni sulinerminni taamaallaat tunngassuteqartoq taamatut inassutaasoq ataatsimiititaliaq isumaqarpoq. Aaqqissuinikkut allannguutissanik pisariaqartitsinerit suliap ataatsimiititaliamut saqqummiunneqannginnerani Naalackersuisut Aningaasaqarnermut Akileraartarnermullu Ataatsimiititaliamut inassutaat imarisamikkut aningaasartamigullu tamakkiisumik akuerineqarnissaminnut qulaajareerneqarsimassasut ataatsimiititaliap naatsorsuutigaa. Taamatut inassuteqarneq taamaattumik pisariaqartussaangikkaluarpoq.

### **Apeqqu 1:**

Ataatsimiititaliap aalajangiineranut suliap nr. 960-imut Naalackersuisut akissutaannut sanilliullugu malittarisassanut akueritinniakkat qanoq annertutigisumik maanna malittarisassaasut nutarter-simavaat?

### **Apeqqu 2:**

Malittarisassat kingulliit qanoq annertutigisumik Naalackersuisunit atorneqarpat

### **Apeqqu 3:**

Partiini siulittaasut siusinnerusukkut nalunaarutigereerpaat malittarisassani 3D naapertorlugu suliffeqarfiit aningaasartuutimik aalaakkaasut 100 %-mik matussusersinnaassagaat Naalackersuisut 80 %-imik killissarititaasut aalajangersagaasuunngitsutut. Naalackersuisut nalilersornikuuaat killissarititaasoq kingunerisassatut kissaatigisaq iluaqutaasimanersoq imaluunniit killissarititaq qaffanneqassanersoq?

### **Apeqqu 4:**

Malittarisassani 2B naapertorlugu Katuaq pigineqassutsikkut inissisimanini pissutigalugu ikiorsiissutinik pissarsisinnaanngitsoq siusinnerusukkut ataatsimiititaliaq nalunaarpoq. Ikiorsiissutit pillugit tassuuna allannguisoqarnissanik pilersaaruteqarnatik tassuuna Naalackersuisut akissuteqareerput. Piffissami sivissusutsumigut ilisimaneqanngitsumi qaangerniarlugulu artornartumi suliffeqarfiit aningaasaqarnikkut tunngavigisaat pitsanngorsarniarlugu, suliffiit ataannarnissaat qulakkeerniarlugu inuussutissarsiutini arlaqartuni tamakkiisumik piuneerunnissaq pinaveersaartinniarlugu ikiorsiissutit tunngaveqartut Naalackersuisut nassuiaapput. Kulturikkut ingerlatsiviit soorlu Katuaq suliarnikkut ingerlatsiinnarsinnaanermikkut qulakkeerneqartut piginnittuminnit allannguutitaqanngitsumik aningaasarsiornikkut tunngaveqartuusoq ataatsimiititaliap taamatut paasissavaa? Kulturikkut suliqartut suliarnikkut ingerlatsiinnarsinnaanngippata pilersaarutaasut Naalackersuisut eqqarsaatersuutigiffigeqqissamaarpat?

### **Apeqqu 5:**

Malittarisassani aalajangersakkat 3E aamma F naapertorlugit akissarsianut aningaasartuutit aalakraasut kiisalu akunnermusiallit sapaatip akunneranut 40 timimik 100 %-mik matussusiisoqartarpoq. Aalajangersimasunik akissarsialinnik akunnermullu akissarsialinnut aaqquissuussineq matussiinertaqanngitsumik siumugassaqaartoqarpa, suullu ajornartorsiutit taakkununga sulinerminnik inuussutissarsiuteqartunut qanoq kinguneqartarpat?

### **Apeqqu 6:**

Upernavimmi tuniluunnermut ernummateqarnerminik ataatsimiititaliaq oqaaseqareerpoq, sumiiffimilu inuussutissarsiutinut eqqorneqartunut taakkunani aalisartut piniartullu ilanngullugit ikorsiisoqarsinnaaneq pillugu Naalakkersuisunut ataatsimiititaliaq apeqquaqarsimalluni. Ikorsiissutit taamaallaat Nuummumut atuuttuusut naalakkersuisut oqaatigaat. Naalakkersuisut isummernissaannut tungavissiami malittarisassaniluunniit ikorsiissutini atuuttuni kingullerni akuerisaasuni taamaallaat Nuummumut atuuttuunerannik allassimasoqanngitsoq ataatsimiititaliap maluginiarpaa. Sumiiffimmi ikorsiissutinik pisariaqartitsisoqarneranik Naalakkersuisut paasinnilersimanerannik una qinnuteqaat paasisariaqarpa?

### **Aningaasaqarnermut Ataatsimiititaliap aalajangiinera**

Siuliani allassimasutut oqaaseqaateqarluni apeqquaqarlunilu Naalakkersuisunit inassuteqaatit siuliani allassimasut Aningaasaqarnermut Akileraartarnermullu Ataatsimiititaliamit **akuerineqarput**.

Ataatsimiititaliaq sinnerlugu



Jens Napaattoq

Ataatsimiititaliami siulittaassoq